

Ki dia ta para cosnan cu ta saliendo for di man

Si tira bista riba nos isla, por ripara cu "buraconan den ley", ceramento di wowo den forma di "mi no a mira" y na mes momento "mi no a tende", a pone cu riba casi tur tereno "cosnan ta bayendo for di man na Aruba".

E culpa di esaki mester wordo tira riba "autoridadnan, riba parlamentaronan, riba gobernantenan" y riba ningun hende mas.

Pakico mi ta bisa asina?

Pasobra ta trata di cosnan cu aña aden aña afo, tur hende ta mira y tende; cosnan cu ta ser publica; leyman cu ta wordo kibra riba tur tereno, y nada ta wordo haci.

Lagamí cuminza awe riba e "caos completo di Postkantoor".

MI NO A HAYA MI CARCHI PASCO AINDA

For di november, e noticia casi diariamente publica tabata encuanto trahadornan di Postkantoor cu a bira diripiente "conseheronan y colaboradornan di ministro".

Tanto keho tabata tin pasobra na Postkantoor no tabata tin hende-pa traha, y post a keda pega.

Hasta demostracion a tuma lugar.

Te cu awe tin trahadornan cu a bolbe y otronan cu no a bolbe, siendo cu tin tambe trahadornan na cas pa lunanan si no ta pa mas cu aña caba, debi na problema cu hefenan.

Papiando cu un conocir di mi, el a contami con el a keda un ora casi, sperando pa haya algun post di dje.

Mi a lague yama telefon, y mi a scucha e conversacion.

El a laga sa cu no por ta asina cu tin post pa yena 50 bari, y e contesta tabata "no pa yena 50 so, pero hopi mas".

Tin tres luna caba cu Post no ta yega cas di hende manera mester ta.

Tin hende for di exterior cu a manda carchi di Pasco for di principio di December pa nan familia, y cu te awe cu nan mes ta na Aruba, e carchi no a yega.

Tin comerciantenan cu ta pega pa motibo cu cierto post di documentonan importante no a yega cerca nan pa varios siman.

Tin hendenan cu ta sperando cuentan cu nan mester paga y no por haya esaki, y asina por sigui menciona.

BUSCA SOLUCION AWE Y NO MAÑAN

E situacion na Postkantoor no ta perhudica solamente hendenan local, pero tambe bishitantenan cu ta sperando post di exterior y no por haya esaki.

Un solucion ta, pa laga voluntarionan bin duna un man pa caba cu e situacion caotico den un tira, y "cuminza cu blaachi limpi" otro siman mes.

Mi sa di hende cu tin intencion di forma un grupo pa bay yuda na Postkantoor y hasta yuda reparti post voluntariamente.

Haci un apelacion riba comunidad pa voluntarionan bin yuda.

Laga orguyo y desconfianza un banda.

Mes ora lo ricibi no 10 pero 100 pa 200 voluntario sigur cu lo kier yuda den e trabaonan aki pa bienestar di e servicio y di Aruba.

Den dos pa 3 dia por caba cu e situacion caotico aki cu un bon coordinacion di e expertonan na trabao den Postkantoor.

E situacion aki no por sigui asina.

CORTAMENTO DI TELEFON TRAS DI OTRO

Hopi hende no a haya nan cuenta pa paga, di SETAR, y e situacion na Postkantoor tin su efecto riba esaki sigur.

Ayera tabata tin cortamento di telefon y fax tumando lugar y hasta negoshinan a wordo perhudica, pasobra nan no a ricibi nan cuenta pa paga y no a paga.

Ta poco tempo pasa por a lesa cu SETAR lo ta flexibel, tumando e situacion di Postkantoor na consideracion, sinembargo, e cortamento di telefon ta tumando lugar manera nada a pasa.

Esaki ta telefon so.

Con lo para cu otro cuentan cu hendenan mester ricibi pa paga, y cu ta pega na Postkantoor?

Cuanto hende financieramente no ta ser perhudica cu e situacion aki? Tira culpa riba Director di Postkantoor?

No... e culpa mester ta riba esnan cu a permiti e situacion yega asina leeuw cu e "ter beschikkingnan" hincando director di Postkantoor den un skina, y consecuentemente esnan cu ta traha bao di dje.

NEW DELHI CENTER Y BOMBAY STREET

Conversacionnan riba nos isla ultimo lunanan ta di e cantidad di establecimentonan Indio cu ta habri riba nos isla y cu tin centro comercial casi den nan poder.

Ta ser papia caba di "New Delhi Center" pa centró di Playa y Nassaustraat cu a bira Caya Betico Croes, awe ta ser yama inoficialmente **Bombaystreet**.

Hopi hende lo kier rabia y bisa cu ta un atake riba indionan esaki ta, pero no ta asina.

Tin hendenan di India cu tin 20, 30, 40 y mas aña riba nos isla den mundo comercial y cu ta goza di respet y admiracion grandi den comunidad.

Mi por menciona aki entre otro, familianan Daryanani, Kimatrai y Boolchand por ehemplo cu pa hopi di nos ta mas Arubiano cu nan ta indio.

Di tempo di "Fanny Shop" (San Nicolas y Playa) den añanan 40 bay ariba, cu tabata e prenda hindu na Aruba. pa awe, ta hopi mes a cambia. Sinembargo ultimo 5 pa 10 aña mundo comercial a cuminza yena cu mas y mas ta habriendo negoshinan, y entre nan mes, "pa motibonan di nan mes tradicionnan" cos no ta mucho bon tampoco.

Negoshinan ta wordo cumpra y pasa over pa e asina yama "hindunan" cu diripiente ta mira riba nos isla.

Awe como doño o hefe, y mañan diripiente nan no ta hefe mas y ta otro hefe ta mira, y despues di tempo caranan ta sigui cambia y diripiente esnan cu a bay a bira doño di otro negoshi.

For di Corsow nan ta biniendo Aruba awor y den seno comercial mes ta wordo papia awe di "Bombaystreet" y "New Delhi Center" na lugar di Playa (parti comercial).

E TENDENCIA COMERCIAL NOBO NA ARUBA

Awe na Aruba tin--- for di aña pasa-- e asina yama "moratorio riba NV".

No mag establece ningun NV mas na Playa, ni restaurantnan, tiendan etc.

E moratorio aki a keda di wordo evalua e aña aki.

Pero kico bo ta haya?

Mi ta haya mi vestigingsvergunning pasobra mi ta establece na San Nicolas y despues di tempo mi ta baha bin Playa toch.

Pa infiltra mas stranhero, mi ta haya mi vestigingsvergunning, pone mi avisonan den corant, keda sin acepta Arubiano of ofrece nan trabao di catibo cu nan no ta acepta, y esaki ta suficiente motibo pa haya permiso pa infiltra hendenan di mi pais den mundo laboral na Aruba.

Mi por cumpra un NV tambe.

Pa yega na un NV tin tramitenan cu mester haci via Notario y varios departamento di gobierno.

Awor cu tin e moratorio esaki ta dificil, pero toch mi ta scapa culpa, cumprando un NV.

Mi ta yama un abogado y via dje mi por cumpra un NV Dormant, esta un NV durmiente, un NV cu no ta den operacion.

Mi ta paga e doño di e NV aki 20, 30, of 40 mil dollar, y tramitenan ta wordo haci pa pasa e NV existente pero no den operacion, over pa e doño nobo.

Tur e cosnan aki ta pasando, y mi no ta kere cu notaronan, hefenan di e diferente departamentonan cu ta tramita permisonan pa establece negoshi etc. no ta na altura di tur e weganan aki.

Pero aunke cuanto hende keho, nan ta sali perdi toch pasobra no tin e control, y ademá di esey, buraconan den leyman ta haci posible tur e cosnan aki riba nos isla.

Un pregunta cu ta keda toch ta: "di unda tur e placa ta sali?"

Juby